

DOMENIE II DI CUARESIME

Antifone di jentrade cf. Sal 26,8-9

Il gno cûr a ti ti fevele,
ti cûr la mê muse.
La tô muse, Signôr, o voi cirintle.
No sta platâmi alore la tô muse.

O ben: cf. Sal 24,6.2.22

Visiti, Signôr, dal to boncûr, de tô misericordie che di simpri e dure.
Che no vedin di sghignî sore di nô i nestrî nemîs;
Diu di Israel, deliberinus di dutis lis nestrî penis.

No si dîs Glorie a Diu.

Colete

Diu, che tu nus âs ordenât di scoltâ to Fi tant benvolût,
indegniti di passi il nestri cûr cu la tô peraule di mût che,
purificât il voli da l'anime,
o podìn consolâsi tal contemplâ la tô glorie.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Gjen 22,1-2.9.10-13.15-18

Il sacrifici dal nestri pari Abram.

Dal libri de Gjenesi

In chei dîs Diu al metè a lis provis Abram. Lu clamà: «Abram! Abram!». I rispuindè: «Ve chi che o soi!». Diu al disè: «Cjape sù to fi, che tu âs dome chel e che tu i vuelis un ben di vite, Isac, e va te tiere di Morie e li tu mal ufrissarâs in sacrifici suntune mont che jo ti disarai». Abram si invià. Rivâts tal lûc che Diu i veve mostrât, Abram al fasè l'altâr e al intassà i lens. Abram al slungjà la man e al cjolè il curtîs par sacrificâ il fi. Ma l'agnul dal Signôr lu clamà dal cîl e i disè: «Abram! Abram!». I rispuindè: «O soi chi!». Dissal l'agnul: «No sta slungjà la man cuintri dal to frut! No sta fâi mâl! Cumò o sai che tu âs teme di Diu: che no tu mi âs rifudât nancje to fi, che tu vevis dome chel». Alore Abram al alçà i vôi e al viodè un roc che al jere restât impirât cui cuars intun sterp e Abram al lè a cjoli il roc e lu brusà sul altâr impen dal fi. L'agnul dal Signôr al clamà dal cîl Abram pe seconde volte e i disè: «Ti zuri sun me, sentence dal Signôr, midiant che tu âs fat chest, che no tu mi âs rifudât to fi, l'unic che tu vevis, jo ti colmarai di benedizions e o multiplicarai la tô gjernazie come lis stelis dal cîl e come il savalon che al è su la rive dal mâr, e la tô gjernazie e rivarà a paronâ lis citâts dai tiei nemîs. Pe tô gjernazie a saran benedîts ducj i popui de tiere, parcè che tu âs ubidît a la mê vôs».

Peraule di Diu.

SALM RESPONSORIÂL dal Salm 115

R. O cjaminarai denant dal Signôr
inte tiere dai vîfs.

O ài vude fede, cun dut che o disevi:
«La mê disperazion e je masse cjalcjade».
E je cetant preseade pai vôi dal Signôr
la muart dai siei amîs. **R.**

E jo, Signôr, o soi un to famei,
to famei e fi de tô sierve.
Tu tu âs crevadis lis mês cjadenis.
Un sacrifici di laut ti ufrissarai
e o clamarai il non dal Signôr. **R.**

O sodisfasarai ducj i miei avôts cul Signôr
in face di dut il so popul,
tai andits de cjase dal Signôr,
tal mieç di te, Jerusalem. **R.**

SECONDE LETURE Rm 8,31b-34

Diu nol à sparagnât nancje so Fi.

De letare di san Pauli apuestul ai Romans
Fradis, se Diu al è par nô, cui si metaraial cuintri di nô? Lui che nol à sparagnât nancje so Fi, ma lu
à dât vie in sacrifici par ducj nô, cemût no nus regalaraial dut, insiemi cun lui? Cui tiraraial fûr
cantins cuintri di chei che Diu al à sielzûts? Diu, che ju justifice? Cui ju condanaraial? Jesù Crist,
che al è muart o, miôr, risussitât, lui che al sta sentât a la diestre di Diu, lui che al pree par nô?
Peraule di Diu.

CJANT AL VANZELI cf. Marc 9,7

R. Laut e onôr a ti, Signôr Jesù!

Dal nûl sflandorôs si sintì la vôs dal Pari:
«Chel chi al è gno Fi il plui cjâr: scoltaitlu!»

R. Laut e onôr a ti, Signôr Jesù!

VANZELI Mc 9,2-10

Chel chi al è gno Fi il plui cjâr.

Dal vanzeli seont Marc

In chê volte, Jesù al cjolè daûrsi Pieri, Zuan e Jacum e ju menà fûr di man, dome lôr, suntune mont
alte, là che si trasfigurà denant di lôr. Lis sôs viestis a deventarin lusintis e tant cjandidis che nissun
lavandâr di chest mont nol rivarès a fâlis vignî cussì cjandidis. E ur comparirin Elie e Mosè, che a
stavin cjacarant cun Jesù. Alore Pieri, cjapant la perauale, i disè a Jesù: «Mestri, ce ben che o stin
culi! Fasìn trê tendis: une par te, une par Mosè e une par Elie». Par dî il vêr, nol saveve ce che al
diseve, parcè che a jerin ducj cjamâts di pôre. Alore ur comparì un nûl blanc che ju invuluçà te sô
ombrene; e dal nûl si sintì une vôs: «Chel chi al è gno Fi il plui cjâr: scoltaitlu!». E lôr, di un
moment al altri, cjalantsi ator, no vioderin plui nissun, dome Jesù, di bessôl, che al jere cun lôr.
Biel che a dismantavin de mont, Jesù ur comandà di no contâi a dinissun ce che a vevin viodût, fin
che il Fi dal om nol fos risussitât dai muarts. Lôr a mantignirin la perauale, ma intant si domandavin
un cul altri ce che al voleve dî resurf dai muarts.
Peraule dal Signôr.

Si dîs O crôt.

Su lis ufiertis

Ti preìn, Signôr, che cheste ufierte nus smondei dai nestris pecjâts
e e santifichi il cuarp e l'anime dai tiei fedêi
par preparâju a celebrâ lis fiestis di Pasche.
Par Crist nestri Signôr.

Antifone a la comunion Mt 17,5

Chel chi al è gno Fi il preferît,

là che jo o ài metude dute la mê contentece.
Scoltaitlu.

Daspò de comunion

Ti vin agrât, Signôr,
di vênus fats partecipâ ai misteris de tô glorie,
che nus permetin di gjoldi des robis dal cîl
biel che o sin ancjemò su la tiere.
Par Crist nestri Signôr.

Preiere sul popul

Benedis cuntune benedizion eterne i tiei fedêi, Signôr,
e fâs che a sedin tant tacâts al Vanzeli dal to Unigjenit
di bramâ cence padin e di vê la furtune
di rivâ a chê glorie che lui si è palesât ai Apuestui.
Par Crist nestri Signôr.